

COLUMNA

La ritgezza da la vita

MARIA CADRUVI

S che mo sis u set chaus s'auzan siador, lura èsi super. Era cun 15 èsi anc adina empernaivel. Ma sch'ins dumbra varga 50 che nodan il medem mument en il bogn avert da 50 meters, lura dovri in stausch per ir en. Ina buna alternativa è lura da spetgar e guardar quant different che carstgauns sa movan en l'aua. «Reichtum von Leben ist, dass Menschen so verschieden sind» m'aveva ina dunna ditg avant blers blers onns en il microfon. Jau aveva fatg in purtret dad ella per l'emissiun «Plaza – leben und reden mit anderen».

Ella tutgava tar ils auters perquai ch'ella aveva sco quai ch'ins schess oz in «Migrationshintergrund». Ses geniturs eran in da l'America dal Sid e l'auter da la Russia. Da sia fatscha na ma regord jau betg pli. Ma ses plects da la ritgezza da la vita, pronunziads cun in accent russ, na vegn jau mai ad emblidar. Cura che jau ves carstgauns che sa deportan «auter», lura vegnan quests plects endament ed jau ma di: Quai è apunta la ritgezza da la vita.

Questa ritgezza sa manifestescha dapertut – pia era en il bogn cuvert. Quel



da Glion è in dals pli bels en il nord da las Alps ed il persunal è zunt amicabel e professional. Da quai èn blers persvas e van di per di a nudar. Jau na tutg betg tar ils quotidians. Ma jau nod guggent – cunzunt sch'jau hai enturn mai mia zona da segirtad. Quai ha da far cun mia malsegirtad. En l'aua sun jau ina temelitga. Nagina ma dastga stuschar, gea gnanca bintgunar.

Sch'jau ves nudaders u nudadras da cumbat, sche guard jau da gea betg nudar vinavant en la medema lingia sco quels. Blers da quels na guardan numnadain betg dretg e betg sanester, betg enavant e betg enavos, malgrà ch'els han savens eglers da nudar. Els han in tempo enorm. Fan sco schi stuessan fugir dal diavel. Jau admir lur tecnica. Lur tactica para dad es-

ser: far sco sch'ins fiss sulet. Lura datti persunas che nodan en in bellezza stil ruas-saivel e tuttina speditiv, senza bittar grondas undas, cun ina fatscha seraina e cuntenta. Plinavant datti persunas che avran lur bucca mintga giada ch'il chau s'auza ord l'aua e fan ina tschera che ma regorda ad ina litgiva en in aquari. I dat las tschintas bellas, quellas che fan aquajogging, tranteren tut patgific, e raquantan ina a l'autra da plans da vacanzas, da biadis u da receipts per sirup da flurs suvi. E lura datti ils turbos. Tar in da quels sun jau ma dumandada, schebain el haja fermà sbattagromas vi da ses pes. Quel fascheva d'in cuntin squitadas e sprizzadas en ina cadenza fitg svelta. Cura ch'el ha ralentà ses moviments, per forza ina mesa secunda, per sa manar, hau jau vis che ses pes eran bluts, resch bluts – nagut da sbattagromas, nagut da nudaglias. Uuuuu! Tge prestaziun!

Sch'igl ha paucs chaus en l'aua èsi magnific dad ir en a nudar. Sch'igl ha blers èsi divertivel da star in mument a l'ur, observar e simplamain surstar – da la ritgezza da la vita, era en l'aua.

Maria Cadruvi, anteriura redactura e moderatura da radio, stat a Ruschein e maina ina «impulseria».